



本著作以創用CC「姓名標示-非商業性-禁止改作」4.0國際授權條款釋出。
 詳細授權條款，請至 <http://creativecommons.org/licenses/by-nc-nd/4.0/>。
 資料來源：教育部電子報「閱讀趣聞客語」專欄 <http://epaper.edu.tw>。

閩／懷想／☆☆☆★

分享的快樂

分享是啥？細漢的時，阿媽捌共我講：「快樂佮人分享是雙倍的快樂。」意思是講：分享是得著快樂上好的撇步。因為分享快樂的代誌，無論是一粒肉粽、一本好冊，抑是講笑談，除了家己歡喜，別人嘛綴咧笑哈哈。這種快樂閣會相湊、相穢，予快樂像春天的花蕊，一四界直直開。

舊年五日節進前，阿媽透早就開始縛粽，無閒甲大粒汗、細粒汗。我倒佇眠床頂，予塗豆、菜脯、香菇的芳味咧甲喙瀾湑湑津，特別是彼塊肥軟仔肥軟的豬肉，害我腹肚枵甲大腸告小腸，緊跔起來共阿媽司奶講：「阿媽！這敢是欲予我食的？」阿媽應講：「戇孫的，這是阿媽欲做予厝邊頭尾的人。食著的人，毋但會當顧腹肚，每一喙攏有阿媽的愛心佮五日節的氣氛，做伙食，較心適。」這就是阿媽彼種歡喜佮人分享的生活態度，莫怪伊的名聲衝甲規庄頭通人知，原來這攏是伊歡喜佮人分享、結好緣得來的。

會記得有一年歇熱，查冊局的時，看著一本冊咧教人按怎輕輕鬆鬆讀冊，我就照冊內面講的撇步，改變我硬死背的習慣。人講食好鬥相報，我隨共這本冊紹介予我死忠兼換帖的好朋友。伊有樣看樣綴我按呢做，效果嘛真好。按呢做予我感覺足滿足，莫怪阿媽講佮別人分享是雙倍的快樂，確實有影。

歇暍日做伙食四秀仔，是我佮厝邊阿明上難忘閣上快樂的分享。因為阿明是我國中的朋友，高中了後就出外讀冊。逐擺轉來，阮攏會做伙開講、拍球，我閣會共阿媽予我的糖仔、餅仔，提出來送阿明。看著伊笑甲比糖仔較甜的笑容，我的心嘛甜物物，閣充滿真真真的歡喜，就親像花開滿天芳，齊齊嬌閣齊齊紅，愈來愈迷人。

總講一句，分享就親像是一種神奇的魔法，只要你肯施展，籬傍壁，壁傍籬，事事圓滿。施展愈濟改，別人笑聲愈濟，連家己的快樂嘛會直直增加。毋過，路無行袂到，事無做袂成，想欲人生快樂笑哈哈，趕緊佮人分享，緊來去做上可靠、上實在。

作者：廖永平

☆詞彙學習☆

【講笑談】
 kóng-tshiò-khue/kóng-tshiò-khe：打諢、逗笑、講笑話。
 【笑哈哈】tshiò-hai-hai：哈哈笑。
 【穢】uè/è：傳染。
 【喙瀾】tshuè-nuā：口水、唾液。由口腔黏膜與唾腺分泌液混合而成的黏液。

【津】tin：滴。
 【大腸告小腸】Tuā-tîng kò sió-tîng：形容人肚子很餓。
 【司奶】sai-nai：撒嬌。恣意做出嬌態以博得對方的寵愛。
 【有樣看樣】ū iūnn khuànn iūnn：有樣學樣。
 【甜物物】tinn-but-but：形容非常甜。